

حكاوى شهرزاد

شعر عامية

زينب أبو الفتوح



رئيس مجلس الإدارة
د. أحمد نوار
رئيس الإقليم
سامية فياض
مدير الفرع
أحمد عميره

مدير التحرير
كامل عيد رمضان
لجنة الاجازة
كامل عيد رمضان
محمد الراوى
على المنجى
المتابعة الإدارية
هنية باشا محمد
أميره خليل

• حكاوى شهرزاد
• زينب أبو الفتوح
• الطبعة الأولى:
الهيئة العامة لقصور الثقافة
إقليم القناة وسيناء
م 2007
• تصميم الغلاف: د. خالد سرور
• رقم الإيداع: ٢٠٠٧/١٤١٦٢
• الترخيم الدولي: 977-437-385-5
• المراسلات:
• إقليم القناة وسيناء
٦ ش عدلى والجيش بالاسماعيلية
بريد: ٤١٥١١، ت.ف: ٠٦٤/٣٩٢٣٦١٢
• الطباعة والتنظيد:
شركة الأمل للطباعة والنشر
ت: 3904096

الآراء الواردة في هذا الكتاب لا تعبر بالضرورة عن توجه الهيئة
بل تعبر عن رأى وتوجه المؤلف في المقام الأول.

حكاوى شهرزاد

نور

كلبلا به بتمدد بإنسانك
ألف فروعى و اتشعبط بجدرانك
فتتنفسنى أيامك
و تطرح حلمك المبتور يَم البحر
و تتعلم آيات الحلم
فتتشكل عيونك نور
يطوف بفروعى بجورى
ينطقتنى زهور ليلك
ابعتها ..
فى أركانك

حكاوى شهرزاد

قراءة فى ديوان "حكاوى شهرزاد" للشاعرة زينب أبو الفتوح...

بقلم/ كامل عيد رمضان

نستطيع أن نقول إن كل قصيدة جيدة لابد وأن تضى لنا حقيقة ما، وتمنحنا معرفة ما، ذلك أن الذى يمتعنا فيها صناعة الشعر وفنه.....

هذا الفن لا يتحقق وحده ولا ينفصل عن موضوعه، فإذا كانت المعرفة التى تقدمها لنا هذه القصيدة مباشرة أو غير مباشرة، وسواء كان التعبير عنها حقيقياً أو مجازياً فهى معرفة لا شك فيها، إنها معرفة تؤدى الى الاستمتاع بما نقرأ . وفى الواقع أننى حصلت على هذه المتعة من معظم قصائد ديوان (حكاوى شهر زاد) للشاعرة زينب أبو الفتوح، فهى شاعرة تدرك بوعى شديد أهمية تجربتها الشعرية، إذ أنها لم تقدم نوعاً من المعرفة الوهمية التى تضلل القارئ، ولم تحلق بعيداً عن الموضوع المطروح .

كان مما يحسب لها فى هذا الديوان حرصها على تسجيل تاريخ كتابة كل قصيدة، مما يضيف الى التجربة الشعرية اليومية إطاراً زمنياً دالاً، كما يحسب لها أيضاً تقسيم الديوان الى أربعة أقسام موضوعية فيما بين هو أجتاعى وما هو وطنى وعاطفى، ومع ذلك جاءت جميع الأقسام منسجمة مع الموضوع العام للديوان وما يحمله

من أسم له . إن الشاعرة تعبر فى كل قصيدة من هذه الأقسام عن الحق المهضوم والتمرد الواجب على الواقع المتوارث وذلك المتخاذل المهين . وهذا القسم الرابع الذى يحمل إسم الديوان هو خلاصة للأفكار المطروحة.. فقد جاء معبراً عن مبارزة موضوعية مع شهربار الذى ترفض شهر زاد الاستسلام لتسلطة واستئثاره بكل شئ واللقاء بحواء الى المجهول ... إن هذا التمرد لتأكيد الذات، وإنما يؤكد اقتحام الشاعرة للواقع الحادث بحثاً عن تغيير المفهوم الخاطئ المتوارث والذى يأتى من خلال فن شعرى جيد لا ينفصل عن موضوع القصيدة .

تلك هى الفكرة العامة للديوان، أما فيما يختص بالقراءة التحديدية لنبدأ من منطلق الاهداء الذى يمثل فى حد ذاته وحدة موضوعية تتفق مع موضوع القصائد المطروحة فى كل الديوان والذى أختارت له الشاعرة اسماً لهذا الاهداء بعنوان (نور) والذى أرى فيه أنه رسالة موجهة من أنثى الى رجلها، تطلب منه حماية الانسانية بناء على شهامته المفترضه فيه كرجل مقابل عطاء لا نهائى منها بمعنى أن يتم التكامل بين السالب والموجب لتكتمل بذلك حلقة الحياة وذلك من خلال كلمات وعبارات رقيقة غاية فى البساطة، وبأخيله وصور موحية مختارة بعناية إذ تقول ،

كلبلابه بتمدد بإنسانك / وأتشعبط فى جدرانك / فتتنفسنى أيامك / فتتشكل نور / / ينطقنى زهور ليلك / أبعترها فى أركانك .

- وحين نتعرض لقصيدة (تساؤل) فإن الشاعرة لم توفق شعرياً فى التعبير عن ذاتها القلقة فى حلم العودة الذى تستهله، يا هلترى

فيه يوم هنعود نعلم بجدار الزمن الستر المليان فيض
- فى حين ان التوفيق كان حليفها بشكل رائع فى قصيدة
(سؤال)ص١٧ الذى تعترض فيه على تلك الحالة المخزية التى
أوصلتنا لحال من الاستسلام والتهاون فى استرداد الحق السليب
فتقول ،

شائلة جوايا كره العالم
وحقد الناس اللى بتموت م الحقد
على كل تابوت... متحنط فيه احساس
على قلب ما حس جراح الناس
ولا أنة طفل برئ ينداس
....

طول ما أحنأ بنسلم ع الخائنين
وبنقعد ع الطرايبزه ونكتب
وبنشرب قهوه وشاى
على شرف الجيل الجاى ...
وهى ذلك تشير الى رفض التطبيع مع الأعداء الذين أهدروا كل
ما هو حق للجوار وكل ما هو شرف وأخلاق .
وعلى نفس طريق الرفض وطلب الحق، تأتى قصيدة
(إحتجاج)ص١٩ لتؤكد تمرداً آخر على كل ما هو مشين أو خطأ
وعدم احترام كل ما هو تنازل لتسجل اعتراضها طلباً للنور الذى
عبّرت عنه باللون الأبيض المثل من بين الظلام صارخاً طلباً
للخلاص .
لما الأبيض يصبح تايه فى الألوان

والمعقول يتجنن
والاحساس العالى السابح فى الاكوان
ينزل نقطه ف نقطه دم
ألف سحابة نور تحتج . . .
ومع كل هذه الالام المحرقة، نجدها تتعلق بهذا الأمل البعيد
المتمثل فى عطاء هذا البحر الواسع البعيد الذى يتعادل موضوعياً
مع عطائها الذى هو من عطائه لها وذلك فى قصيدة تواصل ص ٢١
يا بحر صوتك فى المدى وشاويش .
بترج عب الكون ولا تخبيش
وأمن تحس بنبض آهه
تحتجب ،ما تجيش . . .
والبحر هنا ليس بمعناه الجغرافى المطلق ولكن يكتسب أبعاداً
جديدة فهو ليس بمعناه المادى للبحر، بل هو صورته الدرامية، حيث
يتأثر بما حوله ويؤثر فيما حوله، ومن ثم فهو يسهم فى مسار
القصيدة بحيث يصعب إغفاله لأن فى إغفاله ما يؤثر فى بنية
القصيدة ذاتها . والعتاب للبحر ما هو إلا مناجاة وشكوى للذات
تؤكد التواصل بين ما هو داخل النفس والاطار الخارجى الذى يحيط
بتلك النفس (يا بحر مالك غطى براحك ليه غيوم ؟ . . .) وطرطشة
موجك على جفنى بتتقلب و بتضيع ملامح دمع متصلب وبتطبطب
على عمرى) . . .
أما فى قصيدة (لغز) ص ٢٣ تحاور الشاعرة وقائع زمانها الذى
تراه تاره مثل البحر وأخرى تراه فيها مرجيحه بشكل ترس وتراه
فى وضع ثالث غائضاً بالشك داخل النفس وللتغلب على كل هذه

التقلبات والرؤى يكون الأمل فى الجيل الجديد الذى لا يعبأ بأى متغيرات فهو صادق فى المواجهة وجرئ فى القرار خصوصاً إذا ما تعلق الأمر بأشياء يحبها وتربطه بها علائق مادية وحسية، بمعنى أن الطفل أشجع وأكثر قدرة فى الدفاع عن موقعه، إذ تقول عن هذا الطفل (بيمدد رجله فى وشك وبيعلن عصيانه وبيعلن كل اللى بيخطف مصاصته و يلخبط لعبه وأفكاره . . حتى لو كان الزمن اللغز . .

وكأننى بالشاعرة هنا تأمل أن تواتيها هذه الشجاعة الفطرية للتخلص من قيود فرضها عليها المجتمع والزمن، فاستعادت طفولتها الفطرية المتمردة والمرافقة لكل الضغوط التى تسحب حريتها وتكبل انطلاقها .

وللزمن عند زينب ابو الفتوح واقع دال، خاص وعام كما فى قصيدة (الى أبونا الزمن) ص ٣٣ ومع ذلك، كنت أرى أن قصيدة (إلى أبونا الزمن) كان يلزم لها عنوان آخر كأن يكون (ظنون او خوف) خصوصاً وأنها أجادت فى رسم الصور الداله عليه (الخوف بيلعب فى الوشوش عنقود غضب ... بيحرق اللبلاب / بيصلبه على حيطه جنب الشيش). والصلب بمعناه المادى هو ضياع كل ما هو واعد وأصيل .

يأتى بعد ذلك القسم الثانى من الديوان محملاً بقصائد للوطن تبدأه بقصيدة (صوت الوطن) ص ٣٥ وهى قصيدة فى غاية البساطة استخدمت فيها الشاعرة لغة ومفردات خاصة بها تتميز بعذوبة رقيقة وغزل جميل يبين التوحد بينها وبين الوطن (وباحب أشوفك.. يا لى انت ماسك دفتى.. ما بين كفوفك وباحب أشوفك.. فارس معشق فى

الحصان سيفك فى أيدك... يخطفنى خطف / وبأحب أشوفك شراع
ممدود لحد السما يتهز ساعة الريح ما يحنش). هذا التوحد مع
الوطن هو ثورة الانتماء ومنطلق النماء الذى لا يتأتى إلا لشاعر تزود
بثقافة التاريخ وأرتبط بالارض .

إن خصوصية التجربة الشعرية عند زينب أبو الفتوح، يوضح
تأثرها الواضح بالاتجاه الواقعى فكراً وجمالياً . وهى فى ذلك
أتبعت موسيقى شعرية متنوعة خاصة بها، وتنبع من داخل التجربة،
بمعنى أنها لم تتبع قوالب جاهزة، بل تجادلت الموسيقى الشعرية
عندها مع الموقف والمضمون الذى أرادت التعبير عنه، سواء كان ذلك
صعوداً أو نزولاً عند البداية أو النهاية فى لحظة الموت . وهى فى كل
هذا ترفض الاستسلام والضعف الانسانى وتبى الظلم الجاثم على
حنايا الذات، ومن ثم تدين كل يد أثمة تخنق إبتسامة طفل أو تقتل
حبا فى المهدي . . . كل هذا صاغت غالبية فى صور شعرية دالة وفكر
متسلسل أصيل . تقول فى قصيدة (يعيش الموت) ص ٤٧ الظلم بيغرد
فى قلوبهم.. دايس على دود الأرض / العالم غاوى يموت / . .
عاشق دبذبة الدانة / وصاروخ فايت فى الصوت . . يقطع قلب
الارض، ويحفر كلمة موت).

وإذا كانت شاعرتنا قد حالفها التوفيق فى إلباس قصيدتها هذه
ثوباً من الصور الجمالية فقد نجد هذا يتحقق ايضاً فى قصيدة
(تصريح) ص ٥١ فى نفس القسم الوطنى، والتي جاءت إدانة صارخه
لما وصل إليه حالنا المهين وما آل اليه وضعنا المزرى الضعيف، وذلك
من خلال الصور المقارنة البيانية بين الماضى والحاضر، وإذ تقول، .
وإن كان انا كنت فى زمانى بطل . . دلوقتى خايف . .

همى فى بطن الغيب . . سارح كما الوطاويط .
خائف . . .؟ وبإيه يفيد الخوف . . ؟!
إذا كان أخرها . . راح يطلع لجتتى تصريح .
وهنا تكمن قوة التحدى والاثارة فى أن يكون الموت حياة عندما
يتعلق الأمر بالوطن
والقسم الثالث قصائد تدور فيما بين أفلاك الرومانسية الفكرية
والعاطفة الانسانية المتأججة بين حنايا الذات . . فى هذه القصائد
يتحقق الشرط الأساسى للرؤية الرومانسية، من خلال إبراز الذات
وجعلها محورا أساسيا للرؤية الشعرية، بالإضافة الى ذلك
الاحساسا الحاد بالاغتراب، يصاحبه شعور طاغ بالحزن يدفع الى
المعانى الانسانية الكبرى ويبحث عن الخلاص العظيم .
ويتجلى هذا بوضوح فى قصائد مثل : عشق ص ٥٣ المفروض
٥٨ الزفة ٦٠ وجع ٦٢ قصيدة تسلل ٦٤
ففى قصيدة الزفة، أختارت الشاعرة هذه التفعيلة البسيطة
الغنائية وفى جمل شعرية قصيرة بما يؤكد تكثيف المضمون . . كل
هذا من خلال كلمات موجبة ليس بها تكرار أو تجميل فأضفت مناخا
فكريا وجماليا فى ذات الوقت :
(يا مولود بزفه . . ومبعوث بزفه . . وقايدى شموعك . . وقايمين
سبوعك، يا حاضر دلال) . . . (تنادى الملائكة . . تعالى . . تروح -
وتبعت مكانك . . شجون لم تروح - وذكرى وروح . . وزفه وناس . .
وساعة سفر) . فما أحلى أن يكون الوجدان متأججا بالحب فى لحظة
ميلاد أو ساعة لقاء، أو وداع الى عالم حبيب، ومولد كل هذا العناق
من القلوب إن هذه القصيدة كل هؤلاء مجتمعين .

قصيدة وجع من تلك القصائد الرومانسية التى تبرز فيها الذات
كمحور اساسى للرؤية الشعرية التى تدغدغ الاحساسا بالاغتراب
والشعور الطاغ بالحزن بحثا عن الخلاص العظيم ،

(ولسه بنحكى و نشاور

ونرفع إيد خريطتنا

وحبر العهد يشلب دم

يتمتم، فين عروبتنا ؟

مادام صلينا ع القاعد

وسبحنا ف توابيتنا

وزفينا الحدود للقبر . . . ! !

وفى قصيدة عشق ص ٥٣ نكاد نسمع هذه النجوى الداخلية ونحن
نقرأ القصيدة، لندخل مع الشاعرة فى مناطق الحلم، نلهث وراء المعنى
ونستنشق المضمون العاطفى الراقى وكلمات الحب الرقيقة تطبطب على
المشاعر والاحاسيس لترتفع معه الى عالم تحتل فيه كيمياء الوجدان
نبضات من الروح لا تتوقف عن الخفقان . وقد أعطت الشاعرة لمعنى
العشق لغة راقية وأحاساساً نقياً عفيفاً، إذ تقول ،

أسمع أهتك . . يصرخ قلبى .

أجرى فى صمتك أسكن بوحك

وتخبينى ضفاير ليلك

ينشف دمعى ف خيط مندليك

يطلع صبح الكون . . يناديك .

تضحك شمسك وتبوس نيلك

أخبى شارعنا ف عبي واجيلك . . .

إن زينب أبو الفتوح عندما تكتب شعر التفعيلة، تمتلك ناصية القصيدة بإحكام، وتعطي من شاعريتها تكتيفاً حسيّاً راقياً، لم أجده في هذه القصائد التي تخلت فيها عن تكوينها الأول الذي بدأته وهي عندما تختار البساطة وعاء للجملة الشعرية، تهبط عليها هذه الحالة العينية لتملى عليها صورة شعرية أصلية ما كان لها أن تأتيها بعقلها الواع . مثل تلك الخلاصة في هذه القصيدة (أخبي شاعرنا ف عبي وأجيك) . . .

ولنأت الى هذا القسم الرابع من الديوان والذي يحمل أسم الديوان " حكاوى شهر زاد " تتصدرها اربع حكايات لشهرزاد، وتدور باقى القصائد هنا فى نفس الاتجاه، بها يمثل فى الواقع وحدة موضوعية تحسب للشاعرة .

تقدم زينب ابو الفتوح هذه الحكاية بمنطلق واع يتسم بوضوح الرؤيا والاطلاع، فهي لا ترفض لمجرد الرفض ولا توافق كيفما اتفق إن لكل طرح عندها أسبابه ودواعيه، ومن هنا جاءت الحكايا عندها متفردة . . . عصرية، وليست كما ألفنا سماعها أو قراعتها، بل أوردتها إلينا من خلال مصفاتها ووجهه نظرها الخاصة .

* الحكاية الأولى . وتبدأها بغزل رقيق، تهدف منه ايقاظ إنسانيه شهريار (يالون عيونك سعت الغزل / يا رقة الطفل الوديع . . لمن يتوه وسط القبل). ورغم هذه الرقة الظاهرية لدية والتي عبرت هي عنها، تعود فتذكرك بأنها لم تتخدع بذلك، إذ تقول، (فبحذر . . . عقلى كثير عنك عفى / عن لعة السيف المخبي ف ندهتك . . والباب موارب . . . طول ما أنت سارر(مسرور) على قلبك). ومن هنا

خرجت الشاعرة عن المألوف الشعري في انسيابية التفعيلة الجمليه الى السرد الحداثى الذى أخذنا منها بعيداً حيث تعكر صفاء الصياغة التى بدأت بها القصيدة، ومع ذلك عادت إلينا مرة ثانية فى الجزء الأخير من القصيدة لتهدينا حلاوة شعرية أخرى، (امنحنى صبراً وأستعيد، أحساسك الطفل الزمن و ملامح الفجر الجديد . . يمكن زمانى يغيرك، وتفك أساورنا الحديد).

- إن الشاعرة تعلن هنا عن رؤية تشريحية لرغبات شهريار فتزنة بميزان الواقع المتسلط، وتعلن فى وضوح أنها لم تخدع بنعومة شهريار الظاهرية التى يخفى خلفها واقعة المدان، وهى فى هذا الطرح لا ترفضه بقدر ما انها تريد علاجه من أدران الغريزة، ويحسب لها هنا مقدرتها فى القص الواعى دون مبالغة أو شطط .

* الحكاية الثانية : وفيها تفتح الشاعرة مغاليق الحياه لتكون أكثر صراحة، فتبين الشبق الجنسى عند شهريار وهو يطوف بعينية المنهمتين، بمفاتيح شهرزاد قبل حفل أفتراسها، وفى هذا إنما تدينه وتتهمه بل وتؤكد أن الديك يعلم هذه الحقيقة ورغم ما ينتظرة من عقاب يتعامى عن نظرة شهريار المحذرة اليه بالا يؤذن الا انه يؤذن ثانية معلنا ان الليل قد انصرم والفجر جاء وان على شهريار انتظار يوم جديد لتكمل له شهرزاد باقى الحكاية(بلغنى ايها الملك الغريب..ان العيون المغسولين بالنور، اتعبوك / علموك تتنهّد الانتظار.. وتعد انفاس الطريق.. وتحس برد العمر نار / ساعت عنيك ما يطوفوا بالحو البريق.. يتردد الديك ف الادان / وكائه شايف نيتك.. نظرة عنيك بتحذره.. يدن كمان!)

ومرة اخرى تقلت جمالية التفعيلة من الشاعرة بداية من (بلغنى

ايها الملك المتمرد) ليلفت نحن خيط التواصل الحثي معه وكأنها قد أدركت ذلك فعادت بنا ثانية الى البهاء والرونق الاول فأضافت ذاتية جميلة (ياكون في ايدك ويجوارك.. يلفلبنى نفس دارك / وعقلي يتوه ويختارك حكايتي ضفييره من ليك) وقد كنت ارجوا ان تواظب زينب على هذا النهج الرقيق ولا تتردد ما بين التفعيلة والنثر وذلك كي تكون الرابطة الوجدانية أشد وثاقا وأكثر قربا . ومع ذلك نجدها في اخر هذه الحكاية تؤكد أن علاقة الحب ابقى دواما من علاقة الاشتهاء وكان عونها في جمال التعبير هنا العوده الى التفعيلة (ما تطلقش صدى صوتك ... فيتبعتر في جوفى الحب... ما يرجعش ولو حكمت فيه جيشك)

* الحكاية الثالثة: نلاحظ أنها لم تعط في بدايتها للملك صفة هجاء أو نقد وكأني بها قد اقتربت منه أكثر ومع ذلك عادت فهاجمته مرة اخرى لتوقظ فيه انسانية المختبئه خلف قسوته وذلك بقصد ان يتراجع عن غية ومحذرة اياه اذ تقول (نون الحريم كيد وانت المليك / فاكربانك هتنتهى ع العبد والحره / بس اللى يا مولانا باحكى عليك بره / بره الاطار والهدف وحيرتك المره) ثم تلقى بلقطتها الذكية حين تمزج ما بين الحدوتة والواقع المعاصر المعاش وفي فكرة بديعة تلقى بثقل اسقاط موضوعي يمس الوجدع العام الذى تحياه أمتنا العربية (بان اللى ما يتسمى.. داس بالقدم ع الوجدع ويعتر اللولى.. من حزنها ع الاقصى وسكانه، وحجيج لبيت الله ساعيه على ريقها/ خلى فى موتها صلاه.. تنادى بارئها)

ثم تلقى بالمقارنة المقبلة، طالبة من ملك الحريم ان يفيق فهناك ما هو أثنى وأكثر قيمة من كل الحواذيت والغرائز . (ويا مليكى معذرة

/ النفس مش بالايدي . . وإن كنت قارنتك باللي اتحكي . . إغفر)
وهذه الدلالة تبين ما للشاعرة من قدرة على الرؤى والقص .
* الحكاية الرابعة : وفيها توقف في شهريار نخوة الانسانية،
مذكرة إياه بما يحدث في العالم اليوم، ودور الواجب الوطني أن يعلو
فوق ذاته ليسهم مع الآخرين في أداء هذا الواجب، وهذا تجريح يبعد
كل البعد عن أحلام الحكايات ويقترّب بشدة من الواقع الصعب الذي
نحياه، وهو ما يحسب كإضافة من الشاعرة في استخدام
الأسطورة، ذلك أنه يحسب للشاعر دائماً تطويع الأسطورة لخدمة
الأطروحة الشعرية، وذلك حين نستخدم هذه الأسطورة استخداماً
عصرياً يلفت إليه النظر .

* وهكذا سارت بقية قصائد هذا القسم لتكتمل لدينا الفكرة
العامة من خلال قاموس خاص بالشاعرة يمثل قيمة ويؤكد إنطلاقة
نحو الافضل دائماً .

كامل عيد رمضان

٢٠٠٧/١/٧

١- تواصل



عابر هوى

النيل كورنيشهُ متعَفَّر
معجون بخمرة ألقانا
و بضحكى و شوقك
و عُقد فُل اتحدَف على حجرى
ما استحملش ..
ساعة ما بوسته انفرط ..
لميتهُ جوا إيدك خبيته ف كتابك
و سبت لك كلمه
منقوشه على فرعه
إنك رحيل فى رحيل
و ساعة استثناء
مقطوعه م الزمن البخيل
أما أنا ..
عابر هوى
منسى
حييت أشوف عمرك
ينفع يكون ملكى
ما قدرتش أوصلك
لا حدودى فى كيانك ..
و لا خطوتى ف ضلك

تساؤل

يا هل ترى فيه يوم هنعود ؟
نحلم بجدار الزمن الستر
المليان فيض
ضحكه فى عيون البحر
تمد لأبعد شط
ترقُص على دَقَّة ساعة المغرب
ساعة القمر الساكن حرف الكون
ما يقرب ..
يقعدُ ريح البحر
يرقُب مَلَس الشمس
و هو بيتجرجر على تحت
يطلُّق فى السماوات زغروته
و يهز ستايرى المفروده
يتسربسب من بلكوّنة الأوضه
و يقعد ..
على صوت كروان
بيغيب و يدندن
و الجو ملان بروايح
النعناع المتحضّن باكواب الشاي

و احنا بتلضم عقد حكاوى امبارح
ونحطه فى رقبة بكره الجاى

السويس ١٩٩٤

سؤال

شايه جوايا كره العالم
و حقد الناس
اللى بتموت م الحقد
على كل تابوت..
متحنط فيه إحساس
على قلب ما حس جراح الناس
و لا أنه طفل برىء ينداس
شايه جوايا سؤال ..
أكبر من أسئلة اليوم الآخر
لأمتي؟..
لأمتي حقوقنا
راح تتمرط ف الرجلين
و عيون الحب ف دم شبابنا
هتتلق فين ؟
طول ما احنا بنسلم ع الخائنين
و بنقعد ع الطرابيزه و نكتب
و بنشرب قهوه و شاي
على شرف الجيل الجاي
أه ..

و انا عاجزه حتى عن الأمانى
و رافضه احلم بالخالص
و ياً مخاض ما لهوش آخر
و جنين يبصرخ ف الحشا
راح ترحمونى..
أنزل بَقه ؟!
و إديكو ليّ مشبك
و لا الضلوع ..
أحن عندى من موتى
وسط معركة
و ألف ياه.. على صبرنا
على دوده عشقت أرضنا
و بنسقى فيها ..
و هى ..
تشرب دمنا

٨ أبريل ٢٠٠٠

احتجاج

لما بريق النور يتخفق
لما احبال الوهم تلف
تلف رقبة الحلم يتشنق
لما الابيض يصبح تايه ف الألوان
و المعقول يتجنن
و الإحساس العالى السابح
ف الاكوان
ينزل نقطه ف نقطة دم
ألف سحابة نور تحترق
مش هو زماننا
و لا هيّة دى جنة إنسانا
و لإهيّة محطة هننزل فيها
و لا هو ده كوننا
تيجى نروح ؟
قبل ما نتعود ع الجرح
و يدوب ف حلوقنا زى الملح
و لا تفرقش ساعتها بين الصح
و بين اللي ما عمروش كان صح

السويس مايو ١٩٩٦

تواصل

يا بحر صوتك ف المدى وشاويش
بترج عيب الكون و لا تخبيش
وامن تحس بنبض آهه
تحتجب ما تجيش
يا بحر من ضمة عيونك باعيش
و ازرع بشطك خطوتي
تنده موجاتك ما تخافيش
وامن رميت لك يوم سؤالي
هزيت ستاير القمر
طرطشت موجك ع النجوم
يا بحر مالك
غطي براحك ليه غيوم ؟!
آه.. ما انتاش كتوم
سرى فى جنابك انتفض
باحت به عينك
و مش وحدي اللي بيرىحنى كونك
ضحكة سكونك
شاردة شجونك ساعت سكاتي
هبت جنونك ..

لما اتبعثرت سؤالاتي
ع الشط عيني لم فارقت المركب
ساعة ما ملئت..
آخر خيوط الحلم و انسحبت
و طرطشة موجك على جفني بتقلب
و بتضيق ملامح دمع متصلب
و بتطبطب على عمري

لغز

بشوط ف مرايتك بالأحلام
يا زمن.. ما انتاش مفهوم
لُغز و أوهام
ساعه باحسك زى الفل
أبيض لون الصدق البكر
و ساعه.. ما انتاش راجل
عيل جداً.. بتشوئ كل كلام
و بترمي لعب طفولتنا
و أيام العشره الطوه
و سنين مدرستى و كرارىسى
و شرارة البرق الأولى
للى اسمه الحب
و فانوس رمضان..
و أدان الشيخ رفعت
حُضن امى و ابويا ..
ف سرير يجمعنا أربعة اخوات
كل ده بتحطه تحت شريط القَطَر
قلبك إسود طينه
ما انتاش مفهوم

حسّاك غدار
و بتلعب بالبني آدميين
مرجحتك شكل الترس
بتمررجنا بطحن
بتلففنا مغارة على بابا
ساعة ما يكون النور مقطوع
لا دهب يبهرتنا ..
و لا شكل ياقوت
كل اللي شاغلنا ..
الخوف م الموت
و انت بتضحك زى البحر
بقك واسع
بالع فيه أيام و اعمار
حلو.. و بتحليه بمرار
بردك لاسع زى النار
حتى ف حضنتك ..
قاسي جبار
ما انتاش متعاش
نضارتك بتلم التفاصيل
ما بنشوفهاش
لكن بتغوص جوانا
و بتزرع كل الشك
بتقتل وقت الحب

تخطف لعه بتبرق فى عيون طفل
ساعة ما بيضحك يضحك
و يطلع لك ف لسانه
و يشد ف طرف ودانه..
و يغيظك
أهو ده اللى بجد يغيظك
علشان مش مشغول بنفوذك
لا يهمل سلامك أو نارك
و لا عمره يفكر فيك لو جد ..
لا عمره بيحلم بهزارك
و يا دوب ..
بيمدد رجله ف وشك
و بيعلى عصيانه
بيعلن ..
كل اللى بيخطف مصاصته
و يلخبط لعبه و أفكاره
حتى لو كان ..
الزمن المش مفهوم
اللفز

أحياناً

أحياناً... رجلين الحَقّ تذل
و تفوص في الدرك الأسفل
أحياناً يتقلّ سمع الدنيا
تنسد عندها ..
عن أقرب طاقة نور
لما السما تنمرد ع المطره
و فصول السنه تتبدل
شمسة يونيه بتسكن طوبه
يتبرأ م الزعابيب أمشير
حتى البرق
بطل يعمل فيها غفير
أو يتحدى الضلمه
و يقطع ف عروق دهشتها
بطل يصرخ ..
وقت ما كان مفروض
إنه يحزم كل احياله
و ينزل فوق الأرض
لجل ما يفضح كل الكذب
المتخبي ف عباية الضلمه

و يسكن فصل ف فصل ف دوره

و يهد الجور ..

و يشكل وجه الأرض

يغسل مساحيق ألوانها

فتبان براوزيها الفاضيه

و تفوت ف إطارها إيديه

فتفتت ف بخار الميه

و تعيد الكل لراسه

و تشاور على رجليه

و تقول.. اتنين و اتنين

عمر ما كان ليهم فتوى

و لا مره النور شفناه

يدارى ف حُسن العتمه

أو يفرد ليها جناحه

و يلخبطوا حال القدره

أحياناً ..

تتشعبط كل الشعابيط

و تلف تحدى غريب

تتحول من لُخبيطه

لكيان متولف ع الترتيب

لكن لما بتتاوب و يحل وجعها

بيبان من سقف حنكها

جدر الشعابيط

المربوط باسنان تركيب
يعنى ف هوجة دمع عينيها
راح يقع السن اللولى
و الخيط الكتان.. و دوبارة اللف
و الحبكه المنظومه بجَد
و بشكل جميل أحيانا
تنزل تتبعتر ع الأرض
مجرد شخايط
و أحيانا ..
بيخلينا الترتيب
نتنطط ع المفروض
و نقول للمرفوض
مضبوط ..
أحيانا !!

السويس ١٩٩٧

بين البنين

الكرسى الهزاز ..
ما بقاش بيسعنى
بيقرّص زى النحل
و يزحنى لفوق
و انا لايّده سنين
مش عارفه أفوق
شلت البيت ..
بتبص لى باشمئزاز
و كتاب مفتوح من شهر
على نفس الصفحه
بينادى .. زهقت
بتشال .. يتحط
بين البنين ما بيريحش
الشعر جميل
بيمد ف روى زى العمر
و بيزعل منى
لما باتوه ف الدنيا الواسعه
و ارجع بعد ما سبت حاجات
العالم بيصارع روجه

على حفنة رمل..

على صورة بيت

و انا كم من بيت جوايا ما يتلموش

بيحاولوا يكونوا بيشدو إديا

تتشال م الملح

و تسن اقليم الحبر

يمكن يوم الحلم يكون

أى ولاده

كلمه جديده

أو حتى بيتين

من بحر بعيد

ما عرفهوش حد .

السويس ١٩٩٦

إلى أبونا الزمن

متعسّرهُ يا ولادة اليوم الجديد
متبعثّره يا أرض أنفاسك
وقت الميلاد و الموت
متبشّنين بالظن
و الدايّه مستوده ببارود
لون الحياه ف عنيّا أنّ
نفس السلام مكروش
الخوف بيلعب ..
ف الوشوش
عنقود غضب يحرق اللباب
بيصلّه ..
على حيطه جنب الشيش
ما يكونش ده طرف النهايه
ما يكونش ..
أول الابتدا ف الهد
يا حيل سنين الكون
يا ضهر أبونا الزمن..
اتشدّ ..

٢- صوت الوطن

صوت الوطن

باحب اشوفك
يا اللي انت ماسك دفتي
ما بين كفوفك
و باحب اشوفك
فارس معشوق ف الحصان
سيفك ف ايدك
يخطفني خطف
و باحب اشوفك
شراع ممدود لحد السما
يتهز ساعت الريح
لكن.. ما يحنش
باحب اشوفك يا وله سلسبيل
يرويني ساعت العطش
و ساعت الشوق.. ما يطفئش
و باحب اشوفك يا حبيبي
بطل.. عاشق جدوري
زارع خضاري لو يوم نشف
سارج قناديل الديار
و باحب اشوفك أسرني

و بارفض فيك الاختيار
وباحب اشوفك.. طيب
و احب اشوفك قوى
وقت الهوى.. عمري
وقت الغضب تتلوى
و تقوم كما الإعصار
لو مرّه غيرك جار
و باحب اشوفك
يا اللى انت حاضن جرأتى
فى كتاب كسوفك
و مطوح الروح ف الخلا
باستنى طيفك
شمس انتصار
قمر.. يمسى ع النهار
و باحب اشوفك يا وله
فدادين عيون
صاحبه تسلّم ع البشر
تهدى الهنا.. تهدى العمار
تطمّن اللى انجرح
و تُسُتّر اللى احتار
تشدّ عزم القلوع
و تنور السكه
تزيع ستاير الضنا

و تحطُ وردايه
تكبر ف شباكي
تقوللى وقت البعد
أنا لسه فأكراكي
و باحب اشوفك
يا اللى انت ..
حاضن خطوتى
ما بين صفوفك
و مطمئن القلب إن شرد
عاشقنى أرض و زمن
و شايفنى أحلى وطن
تتشدد له كفوفك
و باحب اشوفك ..

القاهرة

(١)

محدوفه عيني ..
على طرف شارعنا
تسأل تراب السكّه
كده خطوتنا صح ؟!
السكّه بتعانّد قرارها
بتقك روحها من سؤالها
كل ما توصل للجواب
الرد سالب

(٢)

تلات عيون ..
مزروعه ف القهوه
بيقرقزوا الكلمه
ويشدوا ف الشيشه
فتتغفر ..
و تتعفرت ساعات اليوم
باعدي من شوقي عليهم
أدور على أى علامه تغيير
لا قميص بهت

و لا ريحة عرق غيّرت
و لا حتى بخلقت العيون
ف الكون ..
و الرد.. سالب

(٣)

عرقى ف اديا دايب
و هدمى حاضنه حتى قلبي
و الدنيا لسه ف عيني دايله
كل اما اشاور على حته منها
تزووغ و تجرى
جرى خايب

(٤)

استنيت الدهشه ..
ف وشك
أو حتى براءة قلب التونو
دورت على ..
شهامة سن العشرين
اتكعبلت ..
فى سن اليأس

(٥)

مخرومه الأرض ..
بتسرب كل الوقت
و الحب ..

و الإحساس الحلو
و بتشرب... تشرب
بس كأنه الملح
تتشقق.. ألمسها بأيدي
تأْنُ ..
و كأن اللي ..
اتخبى ف جوفها
ما كنش

(٦)

نسمة هوا.. بتحاول تطولنى
و بتمس على ضهرى
ياه..
من أد إيه ..
و انا ما اتخدتش ؟
و لا استجيبش للفصول
من أد إيه ..
و الشمس حارقه فكرتى
و مسوياها..
و منشقه قلبى

(٧)

بافتح عُمرى..
ع الفاضل منى

و بوارب روجى ع البوابه
و باملس بأيامى ..
على باب الحديد
و حشاني جداً.. يا قاهرة
بس احتوائك شىء بعيد
أصبحت اخاف ..
من حبسة الكوبرى
و ضيقة نفسى..
تحت النفق

رجوع

باغافل مشاعر سنين الجفا
واطيّط على البرد يدفا
وباغزل ..
ف توب الليالي الحنان
من شمس بكره ..
المستحيّ فضفضه
وباعلن عنادى فى مرادك
ووصلك و نيلك
يا شادد لجام أمنياتى
تجيبك ..
وتركع دموع عشقى ..
لاجلك رضا
ولا لجلك أنا ..
باحل الضفاير
وباركب فلايك خيطان النهار
وبا فرد فى عودى
وبا رقص ..
على طرف عمرى الخصار
وبالمس حنينك

فيهتز فياً بركان عطش
ما هو انت ..
اللى راوى جدورى
و عشقى لعيونك..
و وجهك و لونك
و سطوة سمارك ..
و زهوك و طولك
و ضمة كيانى المفرط بدونك
باحبك..
باحب اضطرابك
بعُدك.. و فيضك
و بارسم ف كراسة الفضفضه
قلوب يتدوب ف محرابك
تطيب روى..
يطير بى شوق
يوقفنى على بابك
و تفتح لى دراعات جودك
تضم حروفى ف سكاتك
تشبك لى ف شعرى الفل
و تفتح بوابات قلبك
و تحملنى على جناحك
اقول لبيك ..
و اقدم طوعى.. و خضوعى

تلملم يا وطن ف عنيك
سنين سؤالات
و صرة عشق
و ليل يحلم بقتاديلك
و يوم ضايع..
ما هوش مهدور
ما دام ف العتمه..
بان نورك
و شفتك يا وطن و نسييت
سفر آهتي..
ف مواويلك

١٩٩٧

يعيش الموت

مقسومه الكوره ..
و بتبكي ف صمت
مدبوحه خطوطها ..
و بتنزف كبت
و الروح مشقوقه ..
فحت و نحت
الظلم بيغرد ف قلوغه
دايس على دود الأرض
و الريح بتساعده
و بترفص شكل الورد
و بتخفي ملامحه
الضل المرمى ..
يكل سلام ع الأرض
حاضن في ترابها ببيكي
و بيلعن جد الضعف
و غباء الصمت الأزلي
ملعونه الرايه البيضاء
لما يلطخها الجين
ملعون الغصن الاخضر

مرفوع فى وش الظلم
العالم عَلم نفسه
حرب و يتقوم على حرب
و عالمنا كاتم نفسه
مستنظر ساعة الضرب
و قيام الساعة الفاصله
لا سلام..
لا هوان.. ولا رعب
لا مراكب ترقص جوه المينا
و لا طفل بيحضن عمره
لا علم يلملم جهل
و لا نور يتقام ع الصارى
و لا غنوه ف وقت عصارى
و لاواد يتجن بيت
و يدوب أحلام و يغنى
للحلم الملفوف نور
كلّ ده مرفوض
العالم غاوى يموت
عاشق دبدبة الدانه
و صاروخ..
فايت ف الصوت
بيقطع قلب الأرض
و بيحفر كلمة موت

للطفل.. للحُب.. للفل
و مرفوض..
مرفوض نتفرج على بعضينا
و الجرح بيدح فينا
و يغوص جوانا و يغرف
فى سنين اللهفه الماسخه
الباصه ف عين الخايب
وقت اما وجود بالهدنه
و يحاول يفرد ورقه
و احنا بتطوينا الزفه
يعاود ثقله و غدره
و يبطط بيت الرمله
يفرق فى العوامه
و يدوس البت التونو
يقطع ف العرسان
و يدندش توب الفرحة
بالدم اشكال و الوان
تتيم فينا الغنوه..
و يشيخ الحُصن
و يعيش الموت..
يعيش الموت

يناير ٢٠٠٢

تصريح

أنا اللي نَشَفَّتْ الدموع بالريح
و كشفت عورة عرويتي
اتفرج اللي ما يختشوش
قدمت كفني ..
مرجحت شيشة هارون الرشيد
بشويش
أحسن ما يعتقلوني جوا ضريح
و إن كان ..
انا كُنت ف زمانى بطل
دلوقتى خايف ..
همى فى بطن الغيب
سارح كما الوطاويط
خايف..؟
وبيايه يفيد الخوف ؟!
إذا كان آخرها
راح يطلع لجنتى..
تصريح

السويس ٩ / ٢٠٠٢

عشق

هل فيه زِيكُ تاني شبيهه ؟
يا اللى عيونك حُب و تيه
شوق و حنان .. احترت انا فيه
حفظت رجلى مداخل بيتك
لَه حَبَة ناس ع الناصيه
خَبَط زحامك و هدوء غيظك
لَفَة حارتك .. حُضَن زقاقك
سَحَرَت عَقْلِي قُمت هويتك
بين تنهيدك خبيت أهتى
خُفت لتطلع تجرح صوتك
تنبش وسط دفايا تفزى
تقلقى منى .. يبرد حُضَنك
أسمع أهتك .. يُصرخ قلبى
أجرى ف صمتك اسكن بوحك
و تخيينى ضفاير ليلك
ينشف دمعى ف خيط مندليك
يطلع صبح الكون .. يناديك
تضحك شمسك و تبوس نيك
أخبي شارعنا ف عبي و اجيلك

اقعد على حجرِكَ و أغنى
ما انتِ اللى كيانك بيسعنى
و تاريخك ع الكون يرفعنى
يبقى إزاي هيكون لك زى
أحكى عشائهُ.. الناس تسمعنى
يا تاريخي و يومى و كتابي
باعشق حبك.. خوفك.. قلقك
ع اللى مسافر.. و اللى اتأخر
و اللى استنظر بكره و فُكّر
أوع الدمعه ف ننى السكر
لوع الحصه دقيقه اتأخر

١٩٩٥

٣- تسلل

تغيير

لما بسبيك
عمر اللون وزمانه بيقصر
مثلاً الاخضر
خيمه تلملم بركان قلبى لما يفور
و تفرع على أصغر كلمه
ينطق بيها العمر الثاير ع المقدور
لما ساعات الدنيا بتعلن .. مروح
يتبعثر شوقى المغرور
يقلب الاخضر باهت
ما بيفرحش الدمعه
و لا بيدندش منديل راسى
لما بسبيك كله بيصغر
الابيض ماسخ .. الاسود يضحك
و انت بعيد ..
زى الجبل المتحدىنى هناك
زى شمندوره
بتغازل عينى بنورها
وانا قاعده لوحدى
على سور المينا

أحسب ف الايام
واجمع كل حمولى فى عشقك
ما تكفيش صوابع ايدى أعد الناس
لاجل ما اجمع أحلى كلام
قلته لحد الخطوه الجايه
قبل ما اتووه فى عيون الزحمه
وأركب آخر الخط لوحدى
تتفرط أغنيه فى سرى
(سألك حبيبى لوين رايعين)

السويس ١٩٩٦

المفروض

المفروض ..
إِنِّي أَقْلَعُ كُلَّ هُمُومِي بِصَوْتِكَ
وَأُدَوِّرُ بَيْنَ دُرْعَاتِكَ
عَلَى أَحْلَى هَدَايَا بَابَا نُوِيلَ
والمفروض ..
إِنِّي أَقْرُطُ لَكَ فَ التَّفَاحِ
وَأَقُولُكَ غَوْصِ
أَقْطُفُ شَهِدَ وَ عَقْلَ وَ فِكْرَ ..
صَامَتِ مَخْرُوسِ
والمفروض ..
إِنَّكَ تَلْعَنُ كُلَّ الزَّمَنِ الْعَصْبِيِّ
فِي وَجُودِي وَ تَشْكِي
وَ أَنْتِ ..
بِتَغْسِلُ رَأْسَكَ تَحْتَ الْحَنْفِيَّةِ
وَ بَتَعْصِرُ وَجَعَ الزَحْمَةِ فِ عَمْرِي
مَنْ غَيْرَ مَا أَمَلْ
وَ لَا أَصْرُخُ فِيكَ وَ أَتَغْلُ
وَ أَقُولُكَ.. لِيهِ !!!
لِيهِ أَنْتِ الْمُتَشَالِ عِ الرَّاسِ

و أنت اللي معدي فوق جتتنا !9

لو تعرف يوم مخبأ شكوتنا !

و أنت اللي معطر عمرك بدمعنا

بعرقنا الخمران

و مغير ريقك على ندهتنا

و ليه أنت.. بتفرض

و لا تسألش

لو إحنا.. فرضنا

الزَّفَّة

يا مولود.. بزفَّة
و مبعوت.. بزفَّة
و قايدين شموعك
و قايمين سبوعك
يا ضاحك يا باكى
يا حاضر دلال
و ماشى انشغال
محرك قلوبنا و سايب سؤال
يا حكمة وجودك
ف ساعة بُكان
و حكمة بَعادك فى وقتك هناك
تنادى الملايكة ..
تعالى.. تروح
و تبعت مكانك
شجون لم تروح
و نكرى و روح
و زفَّة و ناس
و ساعة سفر

يناير ٢٠٠٢

وجع

و متحرّم على قلوبنا
تدوق الحب
و متحرّم على عيوننا
طيف النوم
و غنوه كنا نهواها
نغنيها.. يروح الغيم
و متحرّم علينا نروق
مادام ف الجسم
شئ يوجع
و صوت بينوح
مهوش مسموع
و كام قلب اندفن بيدق
و ترس حديد
يدور و يشق
نن العين
و برّانا و جوانا
بنتفرج
على صورنا فى الجرائين
ولسه بنحكي و نشاور !

و نرفع إيد خريطتنا
و حبر العهد يشلب دم
يتمتم فين عروبتنا ؟
ما دام صليّنا ع القاعد
و سبّحنا في توابيتنا
و زفينا الحدود للقبر
و خنق الصخر زرعنا
نتوه و النور آدان مرفوع ؟
و أمر و آيه في صلاتنا
هتنتطق بين حروف مصحف
بنهرب منه لذواتنا
و لو طال ينغرز فينا
يفور نومنا و هوانا
و يطلقنا كما الإعصار

السويس ٥ / ٤ / ٢٠٠٢

تسلل

بتفكرنى بعمرى الفايث
و بتتسانى ف كلمة كان
أوارب وش الساعة و اعدى
ألحق منك لو بصايه
نظره ف ثانيه تدفى الكون
تخلق ألف جناح جوايا
يسرح بيا ف حُصن براحك
تسألنى..
هو القمر اكتمل الليله ؟
أجرى ..
و الملم خيط الزمن الواقع
أوصل بكره بطرف امبارح
أما جيبه سينما الدنيا
دارت بره حزام الواقع
و خدتنى ..
ف تقسيمة عود بيدندن
و بيسرح ف النغم الملفوف بالنور
النور الطير الساكن جوه عنيك
اللى كنت نسيت لونها

لكن لما سَرَحْتُ ف عُمرى
وقعت منك آخر كلمه ..
ف حَجَرى
افتكرينى ..
بس بلاش تنتظرى
أحسن خطوة بُكره معايا ..
مبتجمّعش
افتكرينى ..
واوعى تقولى
زى الغريال ..
ما بيحضنش الميّه
ولو بقيت تلج

۴- حکاوی شهرزاد

الحكاية الأولى

يا لون عيونك سَعت الغَزَل
يا رَقَّةَ الطفل الوديع
لَمَنْ يتوه وسط القُبَل
و الدهشة تملأ نظرتَه
تعلن بجهله بالحقايق
بالطوة شهر أَمَن تَهَل
شهر الغضب.. شهر السهر
يا شهريارى ف الحواديت
عاشقاك أنا
مَهْمَن يكون قلبك عنيد
شيفاك بتعلن للرعيه
إن انا ف الغد جايه
سلطانة القلب الشقى
فبحذرک ..
عقلی كثير عنك عفى
عن لمعة السيف المخبي ف ندهتك
و الباب موارب
و شوقك الملهوف باحسَه بارد
طول ما انت سارر مسرور على قلبك

دأبما تلاقى قلبي شارد
و أنا شهر زاد
باحكى حكاية بدلايات
باعصرها من عمر الليالي
و اصبها لك ف الكاسات
و أنت تحاور بالساعات
شوقى الى قايد
بلغنى أيها الملك المعاند
ذو القلب المحايد
بأن قلبك انتسف
و حلم عمرك كتفوه
و رموه على القطب الطريد
بلغنى أيها الملك المعبّد
إن الهوا كثير جرحك
و خيانة المحبوبة نار
بين الضلوع جواك تقيد
و لاني حوا زيتها
فامنحنى صبيرا و استعيد
إحساسك الطفل.. الزمن
و ملامح الفجر الجديد
يمكن زمانى يغيرك
و تفك أساورنا الحديد
و عقد لوليات ليالى

متلصّمه بلحم العبيد
يا أيّها الملكُ السعيد
و يَأْدُنْ الديكُ النهارده
و بُكره ..
أُحكى فيك جديد

السويس مايو ١٩٩٥

الحكاية الثانية

بلغنى أيها الملك الغريب
ذو الزمن المهيب
إن العيون المغسولين بالنور
أتعبوك
علموك تتنهد الانتظار
وتعد أنفاس الطريق
وتحس برد العمر.. نار
ساعت عينيك ما يطوفوا
بالحواء البريق
يتردد الديك ف الأذان
و كأنه شاي ف نيتك
نظرت عينيك بتحذره
يدن كمان
بلغنى أيها الجموح
ذو العشق الفصيح
إن احتوائك كان خديعه
وفخ للقلب اتنصب
مراجيح ليلتك مدبوحين
متعلقين بعيدان قصب

بيدوخوا فيك العروسه
اللى اختيارها اتعصب
و صوت قرارها فقتوه
موتوا شهوت جداله
مبقاش سؤاله عن الفوارس
يتحسب
بلغنى.. أيها الملك المتمرّد
ذو الرأى المتشدد
إنك شبيهه للجد سيد
بتمدد و تتبغدد
كإنك ناحت التمثال
و بجمالين أو ان عصرك
على مهلك ..
هو انت ما وصلش لسمعك
إن القوارير الغلابه
بقيم بشر.. إنسان حقيق
عقل و جسد.. و يا مليكى
ياكون ف إيدك و بجوارك
يلفلبنى نفس دارك
و عقلى يتوه و يختارك
حكايتى ضفيره من ليك
بامرجحها على حيلك
فتسمعنى.. و تتبعنى

فليه قاصد تلاوعني ؟
و تستنى النفس يقصر
و تتمالى أتكسر
و ترعبنى بضلفة باب
نهايته وجه سيافك
و مش ف عيوني خوف منك
لكن باتمنى تفهمنى
بعقلك مش بتهويشك
بحبك مش بتهميشك
ما تطلقش صدئ صوتك
و يصرخ ف المدى طيشك
فيتبعتر ف جوفى الحب
ما يرجعش
و لو حكمت فيه جيشك
ميمهلنيش لنور الغد
عشان أحكى و اوفى الوعد

السويس ١٩٩٥

الحكاية الثالثة

بلغنى أيها الملكُ
بأنك يوماً لم ترتبكُ
وإن حالك ف الهوا
خلاك كما الشلال هادر
بتجز ف اللرقاب
بسيف غادر
تشبه كثير ..
لأبو قلب ترس وجرافات
إبن بقايا المحرقه
بس انت كنت رقيق
بخلافه ميت مره
نون الملاح هدفك
و القتل مش حرفه
بيت عينيك تعالب
بتشوف نوايا الناس
تهجم ع الرمش لو
فكر يتورب سهوه
نون الحريم كيد ..
وانت المليك

فاكر بآنك هتنتهى
ع العبدہ و الحرہ
بس اللی یا مولانا
باحكى علیہ برہ
برہ الإطار و الهدف
و حیرتک المرہ
بلغنی..
یا من کثیراً أتعبتني
بأن اللی ما يتسمى
داس بالقدم ع الوجع
و بعتر اللولی
خلی القلوب تنخلع
من حزنہا الغالی
ع الأقصى و سکانہ
و دمعہ ف حیطانہ
و حجيج لبیت اللہ
ساعیہ علی ریقہا
خلی ف موتہا صلاہ
تنادی بارئہا
و تقول یارب الکون
إنت اللی خالقہا
احکم فی مملکتک
ارفع بقہ غضبک

و يا مليكى معذره
النفس مش بالايدي
و إن كنت قارنتك
باللى اتحكى.. اغفر
(فالشئ بالشئ يذكر)
و يادن الديك النهارده
و بكره أحكى لك جديد

السويس مارس ٢٠٠٢

الحكاية الرابعة

بلغنى أيها الملكُ القَلَقُ
بأنَّ العالمَ .. يحترقُ
و عرايس الحكايات بتتشنقُ
الفوارس ع الجياد ..
صَوَّرَ ما اتحمضتْشُ
بلغنى ..
بأنَّ اللؤلؤَ سَنِمَ البرقُ
و انفجرَ الصمتُ و الهمُ انطلقَ
البنات المستنئيه للطرح
وإبدين الفارس تحمل حلم العمر
و تُرش البيت بالنور و الفل
تستنى الضى ..
المولود ف حجر الفجر
باتت تخاف م الحلم
و تكره الانتظار
رَمَت الخيط .. و إبرة الكروشييه
و راديو بيتن (ما تزوقينى يا ماما)
لبست عباية النور ..
لَفَّت العمر الصُغِيرَ بشاراة عبور

للمستحيل النائم ف حُضِن الغول
يا قلب دَب وريدك دم حُر
ناعم بلمس الحرير..
حليب الجبين
متلفحين بالنار..
متحضنين بياسين
قوم يا مليكى افتح النافذه
الموكب أهه.. طالع لفوق
لجلن ينالوا الجائزه
عرسان بعرض السما
أبدان نجوم ..
ما تدوقش طعم الموت
التوب.. نسيج واحد
الخيوط.. بارود ساجد
و القبله ع الأقصى
بلغنى يا ملك الليالى
إن البنات البسكويت
نفضوا الورق المفضض
و علبه الزينه
و فضلوا صواريخ الاحتفال
زفه وسط الميدان
زغروته ملو الأرض
و فستان..

من عَلم فلسطيني
و يَأدُّن الديك.. النهارده
و بُكره أكيد ..
هاحكلك جديد

السويس ٥ / ٤ / ٢٠٠٢

المرايه

بتكدي ..
و تعلقيني ف الفضاء
و تشكيني نور و نار
الشيش موارب دفته
أمواج سحاب بتطلعي
أنفخ نايات العشق أدووب
و مره واحده توقفيني
عتبة بيتنا بتكسر حلمي
و شارعنا الضيق بيوشوشني
بلاش تكسير
كعبك حائل مسامير ضهري
مهري بتجري ف سبق الخيل
لكن كل ما اطول الخط لآخره
يهرب تحت الأرض و يجري
أرجع ليكي تشد عيوني
جوا إزارك ..
خصله ف شعري ..
بتحلم بالحريه
من حُسن إراز

من بنس الشعر
من أستاذك شادد عقلی
من عين بترقب جوا منی
بتعری خوفی.. بتشیل شرودی
بتعدی فیاً علیاً
ترسم لی مأسک
یسحب ف ضلی
یقتلنی بره الجاذبیہ
أرجع لوحدی
مکشفه للعين الی جوا
ولخرم الإبرم
لما برّوق حرف فستانی

السویس ۸ / ۸ / ۱۹۹۶

يااااااااااااااااااااا

يا ه ..

لو إناك تمسك طرف الليل

علشان ما يطيرش

سكّر سنقوش بالحلم

ما بيستحملش

الوقت سراپ

بيسرسيب روحه زى البرق

و لا يمهاش

و انا ريشه ف إيده

بيطوِّح فيّه و لا بسأش

إحساسى و بس الى انا ملكاه

لكن لو يهرب منى

أكون إزاي ؟

ما اعرفش

الحلم القديم

خلاخيل حصانك مهودين
متكتفين بحبال صدّى
يا فارس العصر القديم
واخذ على حُصن الفضا
و الرُمح ف تلال البوادي
و ضيافة الليل و المدي
خلاخيل حصانك مجروحين
متفرطين ف زمان حزين
احلامه ف الفرسان ..
ظنون
دايماً بترجع مهزومين
و الخيل سروجها معلقه
مشدوده بالوهم لـ ورا
معذره
يا فارس الحلم الجميل
ضهر الحصان أصبح هزيل
ما يشلش حتى سترتك
تقدر تقول لي ؟
إزاي يشيل أمنيّتك ؟

السويس ١٩٩٦

أمنيّه

من تباريحك يا ليل
قلبي ارتعد
لم السكّات ف الغيب... بعد
عن لمسة النور المفضض
بالوعد
ما بقيتش ليك أمنيات
غير كلمتين
و شدّت الطول المرجح ف الخلا
و ضمة السُهد الندي
يا سيدي
يا من تردك ندهتي
من الف عام
يا سيدي
فات الميعاد
و عرفت إنك وجهتي
بس المسافه
شقت الليل
إرتد صبح بيبتدي
يسأل عن الأشياء

و عن الحاجات المبهمة
و عن العيون ..
خافه و مستسلمه
و امتى تكون شايفه ؟
و امتى متلجمه ؟
يا سيدى ..
ما تكونش قارب صيد ف أحلامى
ما تكونش مد
و كفايه تبقى خمس صوابع
متعلقين ف الهوا
ساعة الّلقا تنفرد ..
ساعة الوداع تنشد

حواديت البنات

كنت زمان زيّكوا
فارده ضفاير العُمر
راكبه حصان الحلم
بانده على الفارس
قلبي شراع أبيض
وعنيّه قمريتين
و جبينى شمعايه
واخذه الكتب بالحُسن
طايره كما فراشه
بتبوس ف وردايّه
وتميل على غصنها
ترجلى بحكايه
شاطر حسن و حصان
و مركبه و مينا
عنقود شباب أخضر
راح يستوى بالصبر
ياه ..
كنت زمان زيّكوا
بابوس نسيم المسبح

و أَحْمَلْهُ حَلْمِي
يَطِيرُ لِحْدِ اللَّيْلِ
وِجِينِي فِ مَنَامِي
فَسْتَانِ وَ طَرَحِهِ وَ عَقْدِ
وَإِيدِينَ عَلَى قَدِي
بِتَشْيِيلِ وَ تَرْفَعْنِي
لِفَوْقِ لِفَوْقِ السَّمَاءِ
حَابَهُ أَتَحْدِفُ عَ الْبَحْرِ
أَنْزَلْ وَ اعْوِمْ وَ أَغْرِفْ
فَضَّهُ وَ يَاقُوتَ مِ الشَّمْسِ
يَا شَمْسُ يَا شَمُوسَهُ
خَلِينِي يَا لَلَا عَرُوسَهُ
زَفِينِي سَاعَةَ الْفَجْرِ
وَ ارْمِي الْكُتُبَ مِ الشَّيْشِ
بِشُويْشِ عَلَى حَلْمِي
أَحْسَنْ يَرْوَحْ مَا يَجِيْشِ
يَنْقُصْ وَ لَا يَكْمَلْشِ

السويس فبراير ٢٠٠٣

الضّل

للكون أمارات ف الرضا
و السرّ ف الملكوت له ألف باب
آخر حدودك ف الهوا .. قلبى
أول حدودى قلعتك
أما انهيارات الجليد
بقيت إشارة الابتدا
الكون بدا ..
عناقيد سحب ..
عاشقه تمرجع ف المطر
ضاع لون غموض الليل
و برودة الورده
قساوة ضهر الحصان الاحرس
تاهت خيوط العنكبوت ف الضّل
رَحَفَ الشّتَا آخر
ما عادش ينحت ف الزمن
سكنت دموع الأمنيات
خَبَطَ على إزازى النهار
صحيت ملامحى المسافره
قربت ترجع أنا

أول حدودی قلعتك
آخر حدودك ..
ضحكتی

المحتوى

٧	إهداء قصيدة نور
٩	قراءة فى الديوان للشاعر كامل عيد رمضان
٢١	١- تواصل
٢٣	عابر هوى
٢٤	تساؤل
٢٦	سؤال
٢٨	احتجاج
٢٩	تواصل
٣١	لغز
٣٤	أحيانا
٣٧	بين البينين
٣٩	الى ابونا الزمن
٤١	٢- صوت الوطن
٤٣	صوت الوطن
٤٦	القاهرة
٥٠	رجوع
٥٣	يعيش الموت

٥٦	تصريح
٥٧	عشق
٥٩	٣- تسلل
٦١	تغيير
٦٣	المفروض
٦٥	الزفة
٦٦	وجع
٦٨	تسلل
٧١	٤- حكاوى شهرزاد
٧٣	الحكاية الاولى
٧٦	الحكاية الثانية
٧٩	الحكاية الثالثة
٨٢	الحكاية الرابعة
٨٥	المرايه
٨٦	ياااااه
٨٧	الحلم القديم
٨٩	امنية
٩١	حواديت البنات
٩٣	الظل